

Dies ire, dies illa  
solvet seclum in favilla,  
teste David cum Sibylla.

Quantus tremor est futurus,  
quando iudex est venturus  
cuncta stricte discussurus!

Tuba mirum spargens sonum  
per sepulchra regionum,  
coget omnes ante thronum.

Mors stupebit et natura,  
cum resurget creatura  
iudicanti responsura.

Liber scriptus proferetur,  
in quo totum continetur  
unde mundus iudicetur.

Iudex ergo cum sedebit,  
quicquid latet apparebit:  
nil inultum remanebit.

Quid sum miser tunc dicturus?  
Quem patronum rogaturus,  
cum vix iustus sit securus?

Rex tremende maiestatis,  
qui salvandos salvas gratis,  
salva me, fons pietatis.

Recordare, Iesu pie,  
quod sum causa tue vie:  
ne me perdas illa die.

Querens me sedisti lassus:  
redemisti crucem passus:  
tantus labor non sit cassus.

Iuste iudex ulcionis,  
donum fac remissionis,  
ante diem racionis

Ingemisco, tamquam reus,  
culpa rubet vultus meus,  
supplicanti parce Deus.

Qui Mariam absolvisti  
et latronem exaudisti,  
michi quoque spem dedisti.

Preces mee non sunt dignae,  
sed tu, bonus, fac benigne,  
ne perenni cremer igne.

Inter oves locum presta  
et ab haedis me sequestra,  
statuens in parte dextra.

Confutatis maledictis,  
flammis acribus addictis  
voca me cum benedictis.

Oro supplex et acclinis,  
cor contritum quasi cinis:  
gere curam mei finis.

Lacrimosa dies illa,  
qua resurget ex favilla  
iudicandus homo reus:  
Huic ergo parce, Deus.

Pie Iesu Domine,  
dona eis requiem. Amen.

Dilectissime frater, domine Galle, verbi Dei predictor!

Noli resistere sacramento calicis Domini, quod Cristus per se<sup>1</sup> et per suum Apostolum<sup>2</sup> instituit, quia nulla Scriptura est in oppositum, sed solum consuetudo, que, estimo, ex negligencia inolevit. Modo non debemus sequi consuetudinem, sed Cristi exemplum et veritatem. Iam concilium, allegans consuetudinem, dampnavit communionem calicis quoad laicos ut errorem, et qui practisaverit, nisi resipiscat, tamquam hereticus puniatur. Ecce malicia Cristi institutionem iam ut errorem dampnat.

Rogo propter Deum, quod non amplius impugnes magistrum Iacobellum, ne fiat scissio inter fideles, de qua gaudet dyabolus. Eciā, karissime, prepara te ad passionem in manducacione et comunione calicis, et sta fortiter in veritate Cristi, timore illico postposito, confortans fratres alios in ewangelio Domini Iesu Cristi. Motiva pro communione calicis, estimo, dabunt tibi, que scripsi in Constancia.<sup>3</sup> Salutabis Cristi fideles. Scriptum in vigilia Decem milia militum in vinculis.<sup>4</sup>

---

<sup>1</sup> Cf. Matth 26,26-28; Marc 14,22-24; Luc 22,17-20; Ioh 6,54

<sup>2</sup> Cf. 1 Cor. 11,23-26

<sup>3</sup> De sanguine Cristi sub specie vini a laicis sumendo, Op. I, 42r-44r

<sup>4</sup> 21. VI. [1415]

<sup>1</sup> Factum est autem, in diébus illis éxiit edíctum a Cásare Augústo, ut describerétur univérsus orbis. <sup>2</sup> Haec descríptio prima facta est práside Sýriae Quírino. <sup>3</sup> Et ibant omnes, ut profiteréntur, sínguli in suam civitátem. <sup>4</sup> Ascéndit autem et Ióseph a Galiláea de civitáte Názareth in Iudæam in civitátem David, quae vocátur Béthlehem, eo quod esset de domo et familia David, <sup>5</sup> ut profiteréntur cum María despónsata sibi, uxóre praegnánte. <sup>6</sup> Factum est autem, cum essent ibi, impléti sunt dies, ut páreret, <sup>7</sup> et péperit filium suum primogénitum; et pannis eum invólvit et reclinávit eum in praesépio, quia non erat eis locus in deversório. <sup>8</sup> Et pastóres erant in régione eádem vigilantes et custodiéntes vigílias noctis supra gregem suum. <sup>9</sup> Et ángelus Dómini stetit iúxta illos, et cláritas Dómini circumfúlsit illos, et timuérunt timore magno. <sup>10</sup> Et dixit illis ángelus: “Nólite timére; ecce enim evangelízo vobis gáudium magnum, quod erit omni pópulo, <sup>11</sup> quia natus est vobis hódie Salvátor, qui est Christus Dóminus, in civitáte David. <sup>12</sup> Et hoc vobis signum: inveniétis infántem pannis involútum et pósitum in praesépio.” <sup>13</sup> Et súbito facta est cum ángelo multítudo milítiae caeléstis laudántium Deum et dicéntium: <sup>14</sup> “Glória in altíssimis Deo, et super terram pax in homínibus bona voluntáti.” <sup>15</sup> Et factum est, ut discessérunt ab eis ángeli in caelum, pastóres loquebántur ad ívicem: “Transeámus usque Béthlehem et videámus hoc verbum, quod factum est, quod Dóminus osténdit nobis.” <sup>16</sup> Et venérunt festinantes et invenérunt Mariám et Ióseph et infántem pósitum in praesépio. <sup>17</sup> Vidéntes autem notum fecérunt verbum, quod dictum erat illis de púero hoc. <sup>18</sup> Et omnes, qui audiérunt, miráti sunt de his, quae dicta erant a pastóribus ad ipsos. <sup>19</sup> María autem conservábat ómnia verba haec conferens in corde suo. <sup>20</sup> Et revérsi sunt pastóres glorificántes et laudántes Deum in ómnibus, quae audíerant et víderant, sicut dictum est ad illos.